

A-k 't niet vergète zet ik vri'jdes de radio in mien atelier op de onderd en vieve FM, dan eur ik ZOO. Now e-k niet altied de gelègeneid umme te luusteren, en göt er völle van 't gespröken woord verlören in 't lawaai van de mechines, maer vanmiddag ware ik effen wat ander an 't doen kon ik wel èven luusteren.

Eur ik deur een veraeltien dät ik oe niet wil ontollen.

An taofel bi'j Hanneke en Alie zit Henk Klompenmaker. Ik ken de man niet maer ij ad wel wat te vertellen. A-k 't goed bergepen ebbe is Henke wel in Zwolle geboren, ef e later een poos in Braoband ewoont en ewärkt en is toen toch weer naor Zwolle terugge ekommen. (ij ad 't wel willen kroepen!)

Umdät ij toen al wat older was ewörren is ij ook met andere ogen naor Zwolle gaon kieken en ef de skoonheid van de stad opemerkt.

Henk skient zich in de entertainment te bewegen en ef op een liedtien, dät ij in België ef e-eurd, een Zwolse tekst esköven.

In 't interview dät de dames em ofnammen kwammen een bonke Zwolse namen veurbij, dät ik ze niet ies allemaole meer wete. Ik zal der dus vast wel wat vergèten, maer dät döt gien ofbraek aan 't verael.

Klompenmaker vertellen dät ij, nao ruggespraak met Henk van der Kooi en aoverleg met Henry van Velzen, as GaitJan de Bedelaer ondernemend Zwolle ef benaodert en zo een bak geld veur de produktie van een CD ef op-e-aald.

Anstaonde maondagmiddag wört de CD met de titel [Zwolle is mijn Stad](#) in de feesttente op 't Grote Kärkplein officieel e-introduceerd. Um vijf uur (17.00) zal in alle kroegen tegelieke dät platien wörren edreid. Henke vint 't jammer dät de örgenist met vakantie is anders ad 't cärillon van de Pèperbusse ook nog met-edaon. De CD ef een uutvouwbaere oes met deurop bi'jzöndere zwärt-wit foto's van Zwolle, die deur Marijke Reuvers en Jan Boertien bint verzörgd of emakt. Al met al ku-j gerust vasttellen dät een eel Zwols-collectief zien bi'jdrage ef egöven. De opbrengst van de CD, die maer 5 euro kost, zal ge-eel an een wat minder bekend goed doel in Zwolle gaon.

Zo'n brede samenwerking ebben de gemeenteraodsleden nog nooit kunnen bewärkstelligen.

't Is maer dä-j 't weet!

